

بوقدر متفرق شکل و لون آلمش اولان شوروج و قلبك ادوار تاريخيه ده ابراز
ایتمش اولدینی تجلیاتی مطالعه ایده جکر .

اصغر آغایف

هامش — اقوام تورانیه حقنده دها زیاده مفصل معلومات آلتی ایسته یئر آئیده کی
منابعه مراجعت ایله سونلر : روس لساننده : سبیریا تاریخی — مؤلفی فیشر، سبیریا یه تاریخی
بر نظر — مؤلفی ساوونساف ، آلمانجه — مغول تاریخیه عائد معلومات : مؤلفی « یالاس »
وامبه رینک « تورک عالی » و « ره قلو » نك جغرافیه سی .
آ . آ .



قوجه نشانچی

جلال زاده قوجه نشانچی مصطفی بك

علم و قلم اربابندن سیاست و حکمت اداره یه واقف بر ذات اولوب
« طوسییه » لیدر . تحصیل ابتدائینی وطنی علمانندن ، عالینی استانبول فضلانندن
اکمال ایده رک دولت خدمتته کیروب حائز اولدینی فضیلتی و خطوط اسلامیه دن
خط دیوانی ده کی مهارتی مسلککنده ترقیسنه بادی اولدی . ینه بو سائقه ایله
یاووز سلطان سلیم خان زماننده دیوان همایون کتبه سی عدادینه کیردی . دور
قانونیده (مصر) ه مأمور اولان وزیر اعظم (ابراهیم) باشانک تقدیر و حمایه سنه
مظهر اوله رق وزیر مشارالیه ک تذکره جیلگی وظیفه سیله (مصر) ه کیتدی .
بورادن عودتی تاریخی اولان (۹۳۱) ده (رئیس الکتاب — خارجیه ناظری)
تعیین اولوندی . (۹۴۱) تاریخنده (بغداد) فتحنده بولونوب نشانچی (سیدی)
بکک و ناتی اوزرینه (نشانچیلق) توجیه اولونه رق (۲۴) سنه بووظیفه مهمه
ایله اشتغال ایله دی ، بو خدمت دولایسیله دولک مهمام امورینک حسن صورته
تسویه و تمشیقی خصوصنده یک بویوک لیاقت و رؤیتی کورولدی . (۹۶۴) ده
تقاعدلگی اختیار ایده رک اون سنه (متفرقه باشیلق) له امرار حیات ایتدی ،
و قانونی سلطان سلیمان خانک اسفارندن اولان (سکتوار) سفرنده ده بولونه رق

طغراکشك وظیفه سنی ایفا ایتدی . وَاستانبوله عودتنده (مصطفی بن جلال توقیعی) وُ (الهی رحمت ایله مصطفی یه) مصراعلرینك دلالتی اولان (۹۷۵) تاریخنده ارتحال ایدهرک (ایوب) جوارنده (نشانجی) نامیله معروف محله ده بناسنه موفق اولدینی جامع شریف اتصائله دفن ایدلدی . فضیلت وَاقتدار جهتیله کندیسنه یاقلاشان کوچوک برادری [صالح] [۱] اقدی ده یاننده مدفوندر .

آثاری

(۱) طبقات الممالك فی درجات المسالك

اوتوز طبقه و متعدد درجاته منقسم تاریخی وَاخلاقی مهم برادرر . یکریمی دو قوزنجی طبقه دولت عثمانیه نك او زمانکی اصول اداره و قوانین ملیکه و عسکریه سیله شعبات اداره سنی اوتوزنجی طبقه ده قانونی و قایغنی مین در . طرز تحریری زمانی رواجنه تبعاً منشیانه و اصطلاح پردازانه اولدیغندن بعض اخبار و نقلیاتك حقایق روش افاده یه فدا ایدیلهرک مستور قالمشدر . تخصیص قانونی دورینه عائد منظوم پارچه لری منشور اقسامندن دها روخنوازدر . بر نسخه سی ایاصوفیه کتبخانه سنده واردر .

(۲) (انیس السلاطین و جلیس الخواقین) بواثرک اصل اسمی (مواهب الخلاق فی مراتب الاخلاق) ایسه ده اوچ پادشاهك ده انظار مطالعه لرینه مظهر اولدیغیچون مؤخرآ (انیس السلاطین) تسمیه ایتمشدر . مقدمه سی اسماء حسنی شرحیله موشح ، خاتمه سی صلواة رسول کبریا ایله مزین در . آرالرنده کی الی الی بایده دخی اخلاق حسنه و سینه نك فوائد و مضراتندن باحث اولوب سلطان سلیمان قانونی نامه یازلمشدر . نسخه لری استانبول کتبخانه لرینك بعضیلرنده واردر . بر نسخه سی ده کتبخانه عاجزی بی تزین ایتکده در .

(۳) (سلیم نامه) برجله کیر اوزره مرتب اولان بواثر یاووز سلطان سلیم خانك غزواتی مین اولوب اوغلو خطیله محرر بر نسخه سی (موزه عثمانی) کتبخانه سنده واردر .

[۱] بوذاتك ترجمه حالی آیریجه یازیله جقدر .

(۴) (نشانی مخلصی دیوانچه) طرز اشعاری عاشقانه و حکیمانہ در . ابیاتندن :

فن عشقه باشلادم دقتله کوردم نیجه باب
متنی درد وفصلی ہجران ایلہ دولش برکتاب

(۵) (ترجمہ معارج النبوة فی معارج الفتوة) اصل اثر افاضل امتدن (مثلاً مسکین) شہرتیلہ بنام (معین الحاج محمد الفواہی) نک تواریخ انبیا و سیر حبیب کبریادن باحث فارسی العبارة اثر مشہوری اولوب صاحب ترجمہ (مصطفی) بک طرفندن (دلائل النبوة المحمدی و شمائل الفتوة الاحمدی) اسمیلہ و (۱۰۳۳) دە (مصر) دە وفات ایدن فضلائی عثمانیہ دن (اسکوبی آلتی پارمق محمد) اقدی طرفندن دە اسم اصلیسیلہ ترجمہ اولونمشدر کہ ایکنجی ترجمہ مطبوع اولدیفیچون مشہور و متداولدر .

(۶) (تاریخ قلعة استانبول و معبد آياصوفیه) فارسیدن ترجمہ ایتمشدر .

(۷) جوامع الاخبار فی خصائل الاخیار : مؤلفین عربدن (ابو حفص عمر بن ابراهیم الضاری) نک (احسن القصص) اولان (قصہ یوسف) علیہ السلامہ دائر (زہر الکمام) اسمندہ کی اثرینک ترجمہ سی اولوب نفیس یازیلی و جلدلی بر نسخہ سی (نور عثمانیہ) کتبخانہ سندہ وارد .

جنکلی کوی ۹ مایس سنہ ۳۲۹
بررسی محمد طاهر

تصحیح — اونبشنجی صاییدہ کی « حاجی پاشا » مقالہ سندہ صحیفہ ۴۷۸ سطر ۱۸ دە
« منداثر » کلمہ سی « متن اثر » و سطر ۱۶ دە « فخر الدین » ، « قطب الدین » اولاجقدر .

